

lis Gnovis

■ LA MOTE. 350 agns cun San Nicolau

La Glesie da La Mote, intant dal jubileu pai 350 agns de dedicazion dal so domo a San Nicolau, e je stade sienzude pe conclusion dal pelegrinaç des relicuiis dal vescul sant di Myra ator pes Parochiis de Diocesi di Vittorio Veneto ch'a puartin il so non (comprendudis, duncje, ançe chês di Brugnera e di Sacil, te provincie di Pordenon). La grande celebrazion e je stade guidade dal patriarcje di Vignesie, Francesco Moraglia, e dal vescul Corrado Pizzolo, ai 25 di Jugn. La «Peregrinatio sancti Nicolai», screade li de glesie di San Nicolò del Lido di Vignesie, e jere tacade ai 4 di Dicembar di an passât, cuntun viaç in barcje, a travers de lagune e sù pe Livençe. Il domo da La Mote al fo dedicât ai 2 di Jugn dal 1672, ma la costruzion e jere za començade dal 1516 suntun dissen di Jacopo Sansovino. La furlanetât dal teritori bagnât de Livençe e je marcade tal statût dal Cumon, che si po lei a la direzion: <http://cdn1.regione.veneto.it/alfstreaming-servlet/streamer/resourceld/0e3006fe-1aca-4620-bc31-fdb5f5eb4fdc/statuto.pdf>.

■ PAULÂR. Mil di mont

Il «Presidio Slow Food dei mieli alpini d'alta montagna» al è rivât in Friûl, cu l'adesion di 7 apicultôrs nostrans. La gnove e je stade pandude di «Slow Food», tal so lûc internet (www.fondazione Slow Food.com/it/presidio-slow-food/mieli-di-alta-montagna/), ch'al palese ch'a puedin aderî al progjet dome chei apicultôrs ch'a produsin la sô mil – «rododendro», «millefiori» e «melata di abete» – parsore dai 1400 metris sul nivel dal mâr. Lis impresis impegnadis in cheste produzion a son chês di Andrea D'Orlando di Vile, di Alexandra Moretti di Cjassà, di Luca Poggetti di Misincin di Paulâr, di Orietta Gressani e di Luca Nodale di Pas dal Pure, dai Fradis Marzona di Verzegnis, di Valentina Cacitti di Paulâr e di Maurizio Zanini di Betanie di Tumieç.

■ VÛT DAL TILIMENT. Ospitalitàt responsabil

Il prin catalic de «ospitalitàt responsabil» in Italie, curât de clape dal turisim responsabil «Aitr», tal so viaç «fra lis relazionis» par scrusignâ lis strutturis turisticis ch'a tegnin cont de sostenibilitât ambiental, sociâl e culturâl, restant leadis cu lis Comunitâts là ch'a operin, al à burît fûr ançe te Patrie trê realtâts in scuar cu la «Carta italiana dell'Ospitalitàt responsabile». A son: l'«Ostello Domus Augusta» di Aquilee, la Foresteria «Casa delle Giugiole» di Dogne e l'«Ostello Europa» di San Vit dal Tiliment. La publicazion si pues leile ançe su la rêt des rêts, a la direzion: www.aitr.org/home/ospitalita-responsabile/.

■ UDIN. Omaç al «Mago del flou»

Une mostre dedicate a Silvio Maria Bujatti (1890-1982), tal diesim cuart cjadalan de sô muart, e scree il percors di ricerçe sui fotogrâfs furlans «FotografriFriûl», progjetât de cooperative «Guarnerio» (www.guarnerio.coop) - fotografrifriul@guarnerio.coop «par cognossi e par tornâ a scuvierzi fotografriis e storiis di fotogrâfs furlans». La mostre dal «Mago del flou», cemût ch'al à stât nomenât Bujatti, e restarà imbastide fintremai ai 10 di Lui sul cjistiel di Udin, li de Cjase de Fraterne. Oraris: vinars, 15-18; sabide e domenie, 10-13 / 15-18.

Mercus 6	S. Marie Goretti	Domenie 10	XV Domenie vie pal an
Joibe 7	S. Claudi vescul	Lunis 11	S. Benedet di Norcie
Vinars 8	S. Adrian III pape	Martars 12	Ss. Ermacure e Fortunât
Sabide 9	S. Veroniche	Il timp	Cjalt dut il mès



Il soreli
Ai 6 al jeve aes 5.23
e al va a mont aes 21



La lune
Ai 7 Prin cuart.

Il proverbi
Cul perdonâ ai triscj si puarte dan ai bogns.
Lis voris dal mès
Tai prins cuiinds dis dal mès si semenin i lidrics pal Invier. Si traplantin lifrics, cauliflôrs, brocui, broculuts verzis e capûs.

Fâ gjambe viers Kyiv

Ai 11 di Lui, e je programade un'azion noviolente massive

Stant che i potents dal mont o che no vuelin o che no son in stât di fermâ la vuere europeane di Ucraine e chei altris bocons de «Tierce vuere mondiâl a tocs», la Comunitât civil e je daûr a bati stradis gnovis par fermâ il maçalizi.

Il prin di di Avrîl, e je rivade a Leopoldis la caravane di pàs «#Stopthewarow»; ai 24 di Jugn un'altre marçe pe pàs, ch'e sarâ replicade ai 14 di Lui, e à vût par destinazion Odesse.

Ma l'apontament plui impuartant che il moviment noviolent al è daûr a inmanea al sarâ chel dai 11 di Lui. La di ch'e cole la fieste dal protetôr da l'Europe, san Benedet, e tal inovâl dal massaci di Srebrenica, 5 mil operadôrs di pàs a saran a Kyiv pe «azion massive noviolente» inmaneade dal «Moviment europeu di azion noviolente» («Mean») che, in Italie, al à rivât a congregâ une cuarantine di organizacions de Societât civil.

Ducj a puedin dâsi in note par partecipâ e l'azion e sarâ confermade se lis adesions a rivaran a 5 mil di lôr. «La nestre idee – a sclarissin i organizadôrs tal lûc internet <https://perunnuovowelfare.it/movimento-europeo-di-azione-nonviolenta/> – e je chê di tignî vif, tal senari dal conflit, il podê di trasformazion de noviolence ative, cuntune mobilitazion massive di miârs di civîi europeus». La marçe noviolente e partissarà di Cracovie. Ducj i ativiscj a varan di jessi a 8 a Medyka par passâ il confin fra Polonie e Ucraine, ai 10 di Lui. La manifestazion tes stradis de capital ucraine e je stabilide pai 11 di Lui. I pacifiscj po a tomaran in Polonie e tal dopomisdî dai 12 di Lui a partissaran di Cracovie pal viaç viers l'Italie, in avion. L'iniziativa e pues jessi prudelade, in plui che cu la partecipazion direte, ançe cuntune ufierte e firmant il Decalic di adesion.

Il document al tache cussì: «O lin a Kyiv parcè ch'o vin decidût di no sopuartâ al-



Une coriere e bruse su la strade fra Charkiv e Kyiv, la prime di de vuere (foto di Yan Boechat/VOA)

«O lin in Ucraine parcè ch'o vin decidût che no podin altri di sopuartâ la vuere»

tri la vuere come fat e come pinsîr totalitari ch'al invegne cjâfs e cûrs. La vuere eslargje lis lidris dal scheme binari am/nem, bon/trist, armis sì/armis no e, biel planç, e disegne un mont dulà che nol è pussibil lâ in convigne. O vin decidût di saltâ fûr di chest scheme ideologic, par cirî pinsîrs e relazionis dulà che l'intese e sedi almançul bramade».

«No lin in Ucraine par di ch'o sin bogns e pacifisc – al dis il secont articol dal Decalic. – O lin par stâ dongie dai Ucrains ch'a son stâts assaltâts e marturizâts. O sin li par cjapâju a bracecuel e par condidî il so dolôr... O sin cun lôr – al va in-

devant il tierç pont – par domandâ che lis armis a tasin, par che l'agressôr si ritiri e par ufrîr un jutori ai plui tibiâts e ai fruts».

Il Moviment europeu di azion noviolente al sclaris tal pont numar 5 che la noviolence e je l'arme plui potente pe pacificazion, «plui potente de plui potente arme di distruzion che l'Umanità e rive adore di concepî», cemût ch'al declarave Gandhi, citât dal Decalic intune cun Robert Schumann che, tal innomenât discors dai 9 di Mai dal 1950, al ricuardave che «La pàs mondiâl e podarà jessi difindude dome cun sfuarçs creatifs proporzionâts ai pericui che le menacin». Su lis olmis di San Benedet (ch'al fo ispiradôr in Europe di chê «unitât spirituâl che midiant di jê popui dividûts sul plan linguistic, etnic e culturâl a forin bogns di jessi part di un popul unio», cemût ch'al declarave Pauli VI, proclamantlu protetôr dal continent), i pacifiscj dal «Mean» a tomaran a domandâ ançe la costituzion dai «Cuarpis civîi di pàs», bramâts di Alex Langervie pal 1994, in face dal Parlament europeu, «come fuarce d'intervent tes zonis in vuere buine di fermâ l'«escalation» e di tornâ a fâ sù tramis di cooperazion».

Mario Zili

Sante Margarine. Sunôrs d'Europe

Al tire a di lunc insin ai 15 di Lui «Suns Europe», il «festival des arts in lenghe minorizade» inmaneat di «Radio Onde Furlane» (www.sunseurope.com). Protagoniscj dai concerti logâts a Cormons, Dartigne, Lavarian, Puçui, Romans, Sante Margarine, Udin e Vilalte a saran artiscj ocitans (Alidé Sans), sardegnûi («Meigama»), galês (Carwyn Ellis) e dal País basc («Bestaldean», cun Jaione Dorai, Ernesto Prat e Sara Zozaya) e i furlans Loris Vescovo, Franco Giordani e Davide Tomasetig. Te ultime zornade de rassegne, ai 15 di Lui in place Libertât, a Udin, cun Sara Zozaya, a san presentadis lis «Cjançons dal Cormôr».

Tradizions furlanis dal mès

par cure di Mario Martinis

I PROVERBIS DAL MÈS DI LUI

Setim mès dal an e prin de grande Astât, Lui al è tignût tant che il mès dal cjaldon, cun zornadis dispès pesantis pal scjafoiaç oressif. Sot dai infogâts rais dal soreli, a madressin ortais, pomis, ue e panolis tal sflandôr morbit de nature. Ma dopo dal solstizi, ançe se a pene a pene, il soreli al scomence a sbassâsi tal orizzont e a scurtâ la durade des zornadis. I animâi a stan tal ripâr des frascjis a gjoldi la ombrene, cemût che al tache a fâ ançe l'om pe polse des voris campagnolis prime des vendemis. Cussì in Lui, a tachin lis vacancis o feris par tancj di lôr che a interrompin il cicli produtif ançe intes fabrichis. Lis localitâts di vacance di mont e di mâr a tachin a jemplâsi di int. Par dut l'Astât i coltivadôrs di une volte a vevin il baticûr pe variabilitât des condizions atmosferichis e duncje pal pericul che temporâi, montanis, rogants e tampieste a ruvinassin o a distruzezin lis coltivazions e duncje mès e mès di fadiôs lavôr tai cjamps. Ma jenfri la Madone di Lui e chê di Avost e rivave scuasit simpri una rascje di sec che al preoccupave cetant i contadins, tant che chesj a spietavin cun ansie lis plois ristoradoris massime tes datis des fiestis dai Sants Er-



macure, Marie Madalene e Ane. Ve ca i proverbis di Lui.

- Lui cjalt, anade buine
- Lui dal grant cjalt, bêf ben e bat salt
- Cul cjalt di lui a sparissin i carui La canicule di lui e madrès i fasui
- Cuan che e jentre la canicule se cjate sut e bagne e se cjate bagnât e suie
- Se la canicule e cjate vueits i agârs ju jemple, se ju cjate plens ju disvuade

- A Sant Ramacul (12-VII) il sorc al va in penacul
- A Sant Ramacul un temporâl
- Sante Marie Madalene (22-VII) e vai vultintîr (al vûl di che al plûf)
- A Sante Maria Madalene la cocule e je plene
- Par Sant Jacun (25-VII) la burascje no ti lasse nancje une rascje
- La dote di Sant'Ane (26-VII), un biel temporâl in cane
- A Sante Ane e compâr l'agane
- Sante Ane e fâs la sô montane
- Se al plûf il di di Sant'Ane, al plûf une di e une setemane
- Se al plûf a Sante Ane, tante mane.